



La Cjargne contade in Vietnam

L'an gnûf si è viert sot de lûs des tradizions furlanis, in Vietnam. La ocasion e je stade la ultime presentazion dal libri di **Barbara Bacchetti** "Carnia. Terra di tradizions" (edizion Cierre Grafica), une ricercje aprofondide su chel territori che tradizionalmenti al ven definit "la mari dal Friûl", la Cjargne.

Dopo une prime edizion finanziade de Regjon e esauride di timp, une vore di presentazions ator pe Italie, pe Europe e in Argentine, il Prindalan a Ho Chi Minh City la autore e je stade ospite dal gnûf Fogolâr Furlan dal Vietnam, nassût tal 2013 par volontât dal president **Daniele D'Odorico** e di chei altris socis fondadôrs **Raffae-**

le Somma, Nicola Martinuzzi, Eliano Michelin e Francesco Zaramella.

"O ai volût a fuart cheste ocasion" e dîs Bacchetti "e o soi braurose che e sedi stade dal dut autofinanziade. Si è tratât di un moment une vore preseât di bande dai components dal Fogolâr Furlan, ma ancj dai students universitaris di talianistiche, seneôs di cognossi il nistri patrimoni culturâl".

ANALISI DAI RÎTS POPOLÂRS

Il libri al à chê di aprofondi, tal contest de Cjargne, lis caracterizacions storichis e gjeograficis dal territori, il disvilup des migrazions tipichis de storie

Il Prindalan, **Barbara Bacchetti**, autore di "Carnia. Terra di tradizions" e je stade ospite dal Fogolâr furlan di Ho Chi Minh City par fevelâ dal libri.

» DI **CHRISTIAN ROMANINI**

di cheste tiere, par rivâ ae une analisi profonde di rîts populârs sacris e profans che, inmò in di di vuê, a son puartâts indevant gjenerazions daûr gjenerazion.

Il projet de cuviertine al è opare de artiste **Gemma Agosti**, il quadri di cuviertine al è di **Ezion Cescutti** e lis tantis fotografiis che a compagnin i contributi testuâi a son di **Igino Durisotti** e **Piero Favero**.

"Mi à fat plasê che tancj mi à fat une vore di domandis e a an volût mantignî un contat ancj midiant i social network - e dîs sodisfate Bacchetti, tornade di pôc di cheste impuartante esperience personâl e professionâl -. Par tancj vietnamits la nestre tiere e je un sium, un miraç, par vie che dificoltâts obietivis leadis ae distance che e rapresente un ostacul reâl pe plui part de popolazion che no pues fâ viaç cussî luncs".

Une ocasion duncje di fevelâ dal nistri Friûl e di promovilu, ancj dal pont di viste culturâl "Dal sigûr al è impuartant il setôr enogastronomic, ma nol baste - e sosten Bacchetti -. Si à di pontâ sul confront su lis fondis de storie e de culture parcè che dome cussî si rive a aprofondi la cognossince e la integrazion tra i popui: dome dialogant, lis relazions a puartin a cressi e a favorî gnovis oportunitâts".



ilfriuli@ilfriuli.it

IN FILE 2015

Gnûfs apontaments li dai Colonos

Al va indevant il calendari dai apontaments di In File 2015 organizât dai Colonos (www.colonos.it).

Vinars ai 30 di Zenâr, aes 8 e mieze si fevelarà de "Storie eretiche dal Friûl" cun **Gianpaolo Gri**, **Marco Maria Tosolini** e **Angelo Floramo**.

Vinars ai 6 di Fevrâr, **Danilo De Marco** al presente il documentari "Anarchic e falsari, soregut muradôr" su Lucio Urtubia Jiménez, "l'ultin don Chisiot basc", cu la presince dal protagonist, che al tignarà ancj une conferenze domenie ai 8 di Fevrâr aes 5 dopomisdì intitulade "Storie di un anarchic irriducibil".

Vinars ai 20 di Fevrâr aes 20.45 si fevelarà di "Salts, onescj e... islamics", incuintri cun **Giuseppina Minchella** su la liende di chei soldâts furlans de fuartece di Palme paiâts di Vignesie tra il 1605 e 1652 e processâts devant dal Sant Inquisidôr cu la acuse di conversion al Islam.

Vinars ai 27 di Fevrâr aes 8 e mieze, si ricuardarà **Pier Paolo Pasolini** cul spetacul "Il Vanzeli seont Mateu".

SCOLTADIS DI DRIUS

Ce fadie!

Le femine e jè tornade sfinide dopo un gîr pes buteghis. Sfladant mi à dit: "Ma ti rinditu cont trope fadie che mi tocje fâ par spindi i toi bês?".



radio
fantasy
fm

www.radiofantasy.it

UDINE | VENETO ORIENTALE FM 90.700
PORDENONE FM 95.800

GORIZIA FM 89.100
TRIESTE FM 89.100

PAULARO FM 107.700
TOLMEZZO FM 101.600

la radio tra la gente

SMS: 393 00 90700
diretta@radiofantasy.it
TEL. +39 0431 30022